

VENDIM
Nr. 154, datë 18.9.2020

**MBI FILLIMIN E PROCEDURËS PËR LICENCIMIN E SHOQËRISË “IDI 2005”
SHPK, NË VEPRIMTARINË E PRODHIMIT TË ENERGJISË ELEKTRIKE NGA
HEC “KAMICAN” ME KAPACITET TË INSTALUAR 1860 kW**

Në mbështetje të nenit 16 dhe nenit 37, pika 2, germa “a”, të ligjit nr. 43/2015 “Për sektorin e energjisë elektrike”, të ndryshuar; nenit 4, pika 1, germa “a”, nenit 5, pika 1, germa “a”, nenit 10, pika 3 dhe nenit 11, të “Rregullores për procedurat dhe afatet për dhënien, modifikimin, transferimin, rinovimin ose heqjen e licencave në sektorin e energjisë elektrike”, të miratuar me vendimin e Bordit të ERE-s nr. 109, datë 29.6.2016, të ndryshuar, si dhe nenit 19, pika 1, germa “a” të “Rregullores së organizimit, funksionimit dhe procedurave të ERE-s”, miratuar me vendimin e Bordit të ERE-s nr. 96, datë 17.6.2016, Bordi i Entit Rregullator të Energjisë (ERE), në mbledhjen e tij të datës 18.9.2020, mbasi shqyrtoi relacionin nr. 102/1 prot., datë 7.9.2020, të Drejtorisë së Licencimit, Autorizimeve dhe Mbikëqyrjes, mbi shqyrtimin e aplikimit të shoqërisë “IDI 2005” sh.p.k., për licencim në veprimtarinë e prodhimit të energjisë elektrike nga HEC “Kamican”, me kapacitet të instaluar 1860 kW,

konstatoi se:

- Shoqëria “IDI 2005” sh.p.k., me shkresën e protokolluar në ERE me nr. 1073 prot., datë 1.9.2020, ka paraqitur kërkesën për licencim në veprimtarinë e prodhimit të energjisë elektrike.

- Shoqëria “IDI 2005” sh.p.k., është regjistruar pranë QKB-së në datën 6.3.2006, konform legjislacionit përkatës dhe mban statusin e Shoqërisë me Përgjegjësi të Kufizuar. Në objekt të veprimtarisë së saj shoqëria “IDI 2005” sh.p.k., ka mes të tjerave: Ndërtim hidrocentralesh dhe shitje me shumicë e pakicë të energjisë elektrike.

- Kontrata nr. 621 rep., nr. 116/3 kol., datë 21.5.2020, “Kontratë për ndërtimin, shfrytëzimin dhe administrimin e hidrocentralit ‘Kamican’ me kapacitet 1860 kW, në përroin e Kamicanit dhe përroin e Bistës, me derdhje në lumin Devoll, Bashkia Gramsh, qarku Elbasan”, e lidhur midis MIE-s dhe mbajtësit të miratimit “IDI 2005” sh.p.k., ka një afat 49-vjeçar që fillon nga data e hyrjes në fuqi të saj pas nënshkrimit nga palët.

- Shoqëria ka depozituar në ERE Raportin e Oponencës Teknike (OT) të kryer për projektin e zbatimit të HEC “Kamican”, dërguar nga AKBN-ja, me shkresën e saj nr. 4362/4 prot., datë 31.7.2017, dhe të miratuar nga MIE me miratimin përfundimtar nr. 3157/1 prot., datë 16.4.2020. Ky raport i OT konkludon se projekti i zbatimit për ndërtimin e HEC “Kamican” plotëson kushtet teknike dhe standardet e projektimit.

- Shoqëria ka depozituar në ERE miratimin përfundimtar të MIE-s dhënë me shkresën nr. 3157/1 prot., datë 16.4.2020, për ndërtimin e HEC “Kamican” me kapacitet prodhues 1860 kW, në përroin e Kamicanit dhe përroin e Bistës, me derdhje në lumin Devoll, Bashkia Gramsh, qarku Elbasan.

- Shoqëria “IDI 2005” sh.p.k. ka depozituar në ERE kontratën e qirasë “Për dhënien në përdorim të fondit pyjor dhe kullësor publik”, me nr. 1322 prot., datë 28.2.2018, e lidhur midis Bashkisë Elbasan, në cilësinë e qiradhënësit, dhe shoqërisë “IDI 2005” sh.p.k., në cilësinë e qiramarrësit. Gjithashtu shoqëria “IDI 2005” sh.p.k. ka depozituar në ERE edhe kontratën e qirasë “Për dhënien në përdorim të fondit pyjor dhe kullësor publik” me nr. 7126 prot., datë 10.12.2017, e lidhur midis Bashkisë Gramsh, në cilësinë e qiradhënësit, dhe shoqërisë “IDI 2005” sh.p.k., në cilësinë e qiramarrësit.

- Shoqëria “IDI 2005” sh.p.k. ka përcjellë në ERE “Miratimin për pikë lidhje për HEC ‘Kamican’” me nr. 440/1 prot., datë 23.1.2019, nga i cili rezulton se HEC “Kamican”, me kapacitet të instaluar 1680 kW, do të lidhet me rrjetin e shpërndarjes në zbarat 35 kV në n/stacionin Gramsh.

- Shoqëria ka depozituar në ERE “Leje për përdorim të burimit ujqor” me nr. 1196 prot., datë 30.10.2018, të miratuar nga KBU Seman, me vendimin nr. 18, datë 25.10.2018, për shoqërinë “IDI 2005” sh.p.k., me qëllim përdorimin e burimit të ujit për prodhim energjie.

- Shoqëria ka përcjellë në ERE “Vendim për VNM-në paraprake”, lëshuar nga Agjencia Kombëtare e Mjedisit me nr. 614 prot., datë 11.2.2020, me nr. 7 vendimi, për personin juridik “IDI 2005” sh.p.k., “Për të zhvilluar projektin ‘Ndërtim i HEC ‘Kamican’”.

- Aplikimi i shoqërisë “IDI 2005” sh.p.k., plotëson pjesërisht kërkesat e parashikuara nga ERE në “Rregulloren për procedurat dhe afatet për dhënien, modifikimin, transferimin, rinovimin ose heqjen e licencave në sektorin e energjisë elektrike”, si më poshtë:

Në lidhje me dokumentacionin e kërkuar nga rregullorja sipërcituar, rezulton si në vijim:

- Format i aplikimit (neni 9, pika 1, germat: “a”, “b”, “c”). Plotësuar në mënyrë korrekte.

- Dokumentacioni juridik, administrativ dhe pronësor, neni 9, pika 2. – (Vërtetimi për regjistrim dhe ekstrakt historik nga Qendra Kombëtare e Biznesit, QKB), do t’i kërkohej shoqërisë depozitimi i certifikatës së regjistrimit. (Vërtetim nga Gjykata dhe Prokuroria), në vijim, në zbatim të nenit 11, të rregullores së licencimit (dokumentacioni shtesë), do t’i kërkohej të depozitojë në ERE edhe vërtetimet e gjykatës dhe prokurorisë nga rrethet gjyqësore ku ka selitë, për vetë shoqërinë dhe për administratorin e saj).

- Dokumentacioni financiar dhe fiskal, neni 9, pika 3. - Neni 9, pika 3, germa “c” (Dokumente që vërtetojnë aftësinë ose mbështetjen financiare të aplikuesit). Shoqëria ka paraqitur në ERE vërtetimin bankar. Do t’i kërkohej ta përcjellë të rifreskuar vërtetimin bankar, si dhe dokumentacioni për mbështetjen financiare për ndërtimin e veprës referuar vlerës së investimit në kontratë.

- Dokumentacioni teknik për HEC.

Neni 9, pika 4.1.2. Të dhëna për bllokun e transformimit dhe lidhjen me sistemin. Do t’i kërkohej shoqërisë të plotësojë emërtesën e prodhuesit të transformatorit.

- Dokumentacioni tekniko-ekonomik. Plotësuar.

Neni 9, pika 4.1.4, germa “a” (Studimi i fizibilitetit).

Neni 9, pika 4.1.4, germa “b” (Grafiku i zbatimit të projektit).

Neni 9, pika 4.1.4, germa “d” (Plani i biznesit).

- Leje nga institucione të tjera.

Neni 9, pika 4.1.5, germa “a”, (Miratimin e OST-së ose OSSH-së për lidhjen e centralit në rrjetin elektrik të transmetimit ose shpërndarjes). Konstatohet se kapaciteti i HEC, i pasqyruar në këtë miratim (1680 kW), është i ndryshëm nga ai i kontratës me MIE-n (1860 kW). Do t’i kërkohej shoqërisë ta saktësojë atë me kontratën me MIE-n dhe ta përcjellë edhe njëherë në ERE të saktësuar miratimin për pikën e lidhjes me rrjetin e shpërndarjes.

Neni 9, pika 4.1.5, germa “b” (Leja e përdorimit të ujit për prodhimin e energjisë elektrike). Plotësuar.

Neni 9, pika 4.1.5, germa “c” (Leje mjedisore). Në VNM-në paraprake konstatohet se kapaciteti i HEC, i pasqyruar në të (1680 kW) është i ndryshëm nga ai i kontratës me MIE-n (1860 kW). Do t’i kërkohej shoqërisë ta saktësojë atë me kontratën me MIE-n dhe ta përcjellë edhe njëherë në ERE me saktësimet në lidhje me VNM-në paraprake.

Për dokumentacionin shtesë apo atë të munguar, do të njoftohet aplikuesi që në bazë të nenit 11, pika 1, të “Rregullores për procedurat dhe afatet për dhënien, modifikimin, transferimin, rinovimin ose heqjen e licencave në sektorin e energjisë elektrike”, të ndryshuar, t’i paraqesë ato brenda afateve.

Për gjithë sa më sipër cituar, Bordi i ERE-s,

VENDOSI:

1. Të fillojë procedurën për licencimin e shoqërisë “IDI 2005” sh.p.k., në veprimtarinë e prodhimit të energjisë elektrike nga HEC “Kamican”; me kapacitet të instaluar 1860 kW, për një afat 30-vjeçar.

2. Drejtoria Juridike dhe e Zgjidhjes së Mosmarrëveshjeve të njoftojë aplikuesin për vendimin e Bordit të ERE-s.

Ky vendim hyn në fuqi menjëherë.

Për këtë vendim mund të kërkohet rishikim në ERE brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti